



Peqqissutsimut Ilaqutariinnermullu Naalakkersuisoq

Inatsisartunut ilaasortaq
Juliane Henningsen, Inuit Ataqatigiit
-/maani

Inatsisartunut ilaasortap Juliane Henningsenip, Inuit Ataqatigiinneersup, § 36, imm. 1 pillugu apeqqutaanut allakkatigut akissuteqaat.

Danmarkimi ilinniagaqartut kattuffiata, AVALAK-p kigutileritittarnermut tunngasunik ilaasortaminik misissuisimanerat naalakkersuisut qanoq qisuariaateqarfigineraat pillugu apeqquteqaat.

Danmarkimi ilinniagaqartut kigutileritittarnikkut atugarisaat tassungalu apeqqutit tunngassuteqartut pillugit inatsisartunut ilaasortap soqutiginninneranut qujavunga:

1. Danmarkimi ilinniagaqartut kattuffiata AVALAK-p kigutileritittarnermut tunngasunik ilaasortaminik misissuisimanerat naalakkersuisut qanoq qisuariaateqarfigaat?
2. Danmarkimi ilinniagaqartortatta kigutaasa nakorsarneqartarnerat pillugu nuanatsinni naalakkersuisut immikkut ittumik iliuuseqarnissamik pilersaaruteqarpat?
3. Illoqarfissuarni Københavnimi, Århusimi, Aalborgimi Odensemilu annerusumik ilinniagaqarniartut katersuuteqqapput. Naalakkersuisut pilersaaruteqarpat illoqarfinni taakkunani immikkut kalaallit ilinniagaqartut kigutileritittarnikkut nutaamik aqqissuussiffiqeqarnissaannik?
4. Naalakkersuisut massakkut pilersaaruteqanngippata siunissami nutaamik aqqissuussinissamik pilersaaruteqassamaarpat?

Danmarkimi ilinniagaqartut kigutileritittarnikkut atugarisaat qulaajaaviginialugit AVALAK-p ilaasortami akornanni misissuisimanagera, naalakkersuisut ajunngilluinnartutut isigaat.

Kigutigissuunissaq nalingissaasumik oqaatigalugu:

Innuttaasut peqqissuunissaannut pilersaarussiaq naalakkersuisunit akuersissutigineqarnikuuvoq, ilaatigut kigutigissuunissaq pillugu anguniakkanik imaqartoq. Pilersaarummit erserpoq tassalu, sulisussaqaarniarnikkut pissutsit pissutigalugit innuttaasunik inersimasunik aqqissuussaasumik kigutigissaanikkut sullissinissamut periarfissaqanngitsoq.

”Innuttaasut inersimasut nalingissaasumik kigutileritinnissamut pinaveersaartitsinermik ilaqartumik aamma kigutileritinnermik pisut ilaatigut killeqarsinnaasumik passutsinniallutik namminneerlutik kigutileriffimmut saaffiginnittassapput”

12. januar 2009

Postboks 260
3900 Nuuk
Oq/tel +299 34 50 00
Fax +299 32 55 05
IPN@gh.gl
www.nanoq.gl/

Kigutigissaaneq pillugu Namminersornerullutik Oqartussat nalunaarutaat nr. 15, 13. september 2006-imeersoq naapertorlugu kigutigissaaneq ingerlanneqartarpoq. Ilaatigut tassanga erserpoq tassalu, inersimasut akeqanngitsumik kigutileritinnissamut neqeroorfigineqartarnissaat pingaartinneqartoq kigutileriffimmi sulisussaqaarnikkut tamanna pisinnaatillugu.

2008-imi decemberimi peqqinnissaqarfinni 17-ini arfineq-marluk kigutilerisoqanngillat.

Danmarkimi ilinniagaqartunik kigutigissaaneq kigutilerisarnerlu Ilinniarnersiutisiat pillugit Namminersornerullutik Oqartussat nalunaarutaat nr. 8, 27. marts 2008-imeersumi, § 65, imm. 3. naapertorlugu nalimmassarneqartarpoq. Nalunaarut Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfimmit (KIIN) aqunneqarpoq.

Ad. 1:

Danmarkimi ilinniagaqartut kattuffiata AVALAK-p ilinniartut kigutileritittarnikkut atugaannik nalunaarusiaa tigoreerlugu Ilaqutariinnermut Peqqissutsimullu Naalackersuisoqarfiup nalunaarusiaq Peqqinnissakkut aqutsisoqatigiinni kigutilerisut pisortaanerannut misissortippaa. Tamanna tungavigalugu kigutilerisut pisortaanerat naatsumik nassuiaasiorpoq (bilagitut ilanngussaq).

Kigutilerisut pisortaanerata nalunaarusiaanut tunngatillugu KIIN-ip taakkartorpai:

- tassalu ilinniarnersiutisiat pillugit nalunaarut naapertorlugu (taamaallaat) pinartumik pisoqartillugu kalaallit nunaata avataani ilinniartut kigutileritinnermini aningaasartuutigisaat Namminersornerullutik Oqartussanit matussuserneqarsinnaasut, suliaritinnissaq tamanna namminersornerusut Danmarkimi kigutilerisunut siunnersuisuata pinartutut nalilerlugu akuerippagu
- tassalu pinartumik kigutileritinnermi aningaasartuutit Namminersornerullutik Oqartussanit akilerneqassasut (ilinniartup ilinniarnermi kommunerisaanit pinnani). Aningaasartuutigisanik utertitsineq Danmarkimi Kalaallit Illui aqqutigalugit pisarpoq, ilinniartut ilinniarnersiutisiaannik aqutsisuusunit.

Ad. 2 aamma 3:

Kalaallit ilinniagaqartut ukiumut ataasiarlutik akiliunneqarlutik angalatinneqarnermini taamaallaat 50%-iisa kingutileritittarnerat, ajornartorsiutaasoq Naalackersuisut takusinnaavaat, kiisalu ilinniartut ilaasa atuangiffeqarnermi nalaanni Kalaallit Nunaannut tikeraarnermini, najukkaminni kigutilerisoqannginnera pissutigalugu kingusiarnissaminnut periarfissaqartannginnerat. Naalackersuisut maannangaaq pilersaaruteqanngillat inatsisit maannakkut atuutsinneqartut allanngortinnissaannut, tassunga ilanngullugu, Danmarkimi ilinniagaqartunut kigutigissaanikkut immikkut isumaqatigiissusiorsinnaanissamut periarfissatigut, nalinginnaasumik imaluunniit Københavnip, Århusip, Aalborgip Odenselluunniit akornanni.

Ad. 4:

Danmarkimi ilinniagaqartut eqqarsaatigalugit kigutigissaasarnermut tunngasunik allannguinissamik Naalakkersuisut maannangaaq pilersaaruteqanngillat, soorluttaaq aamma - ukioq 2009-imut aningaasanut inatsisissaq aqputigalugu - Danmarkimi ilinniagaqartut kigutileritinnerannut atatillugu aningaasanik atugassanik Naalakkersuisut immikkoortitsisimangitsut.

Inussiarnersumik inuulluaqqusillunga

Naja Petersen

Ilaqutariinnermut Peqqissutsimullu Naalakkersuisoq